

## PREDGOVOR

**K**njiga je nastala kao potreba za jednim sveobuhvatnim materijalom koji treba da Vas uvede u tajne projekt menadžmenta, kao teorije, prakse, vještine, umjetnosti, profesije i nauke. Potreba je nastala kada je u Bosni i Hercegovini osnovano Udruženje za upravljanje projektima kao članica IPMA (International Project Management Association) – Međunarodne asocijacije za upravljanje projektom, i kada su kandidati za polaganje sertifikacionih ispita počeli da tragaju za knjigama koje treba da im daju, prije svega, teorijsku, a za više nivoe sertifikacije (C, B i A) i praktičnu podlogu za polaganje ispita.

Knjiga je strukturirana tako da prikazuje sve podprocese (faze) u upravljanju projektom, a koje su predviđene u NCB – nacionalnoj osnovi za ocjenjivanje kompetencija. U tom smislu knjiga obuhvata pored uvoda i šesnaest poglavlja u kojima se na sistematski način opisuju faze u upravljanju projektom, posljednje 18. poglavlje sadrži veliki broj priloga koji su rađeni na praktičnom primjeru jednog investicionog projekta.

Možda je mala manjkavost ove knjige što se dobrim dijelom orijentisala na **investicione projekte**, ali se nadamo da nismo pogriješili, jer je činjenica da ova vrsta projekata angažuje najviše ljudskih i materijalnih resursa i najčešće su ovi projekti veoma složeni i dugotrajni. U velikoj mjeri se navedeni procesi mogu primijeniti i na druge vrste projekata u istom ili manje modifikovanom obliku, zato knjiga ima kombinovan karakter teorijsko-praktičan.

Problemima projekt menadžmenta u BiH počelo se odskora baviti, u svim sferama ljudskog života. Veliki broj nerealizovanih projekata dovode do toga da projekt menadžment i projekt menadžeri moraju imati određenu ulogu sa ciljem poboljšanja realizacije projekta u cjelini, a što je posebno istaknuto u knjizi, i kao takva dostupna je i svima onima koji se bave ovom problematikom.

Sam nivo znanja iz projekt menadžmenta predstavlja ograničenje između uspješnih i neuspješnih organizacija, pa ga zato treba stalno razvijati i unapređivati i to treba da bude jedan od imperativa.

Autori su učinili značajan napor da savremena teorijska i praktična dostignuća iz oblasti projekt menadžmenta pravilno objasne, razvrstaju i slože u jednu cjelinu dostupnu svima onima koji se ne bave ovom problematikom. U knjizi su prikazani najnoviji koncepti, filozofije, metode i tehnike, koje se primjenjuju u razvijenim zemljama svijeta.